



Pers A

01-07-2018

Explicaziuns davart la clamada en servetsch militar

Clamada (art. 84 - 89 OOSM, p. 34/36/39 regl 51.002.01 brevier)

1. Per detagls areguard l'entrada en servetsch è decisiv il cumond da marschar personal. Durant sia valaivladad dat il cumond da marschar il dretg da viagir en unifurma gratuitamain sin tut ils trajects da las interpresas svizras da transport.

2. Persunas obligadas d'entrar en servetsch militar che n'han betg anc survegnì il cumond da marschar personal **14 dis avant il cumenzament dal servetsch**, annunzian quai immediatamain al cumandant da lur furmaziun d'incorporaziun resp. al post che ha annunzià il servetsch.

3. Ina clamada en servetsch speziala survegnan:

- tut quellas persunas obligadas da far servetsch militar, da las qualas la furmaziun d'incorporaziun n'è betg menziunada sin la clamada publica u nua ch'il champ da datas cuntegna in «x»;
- AdA che ston entrar pli baud en servetsch militar resp. che vegnan relaschads pli tard;
- AdA che na prestan lur servetsch militar betg cun lur furmaziun d'incorporaziun u quels, dals quals las datas dal servetsch èn vegnidas midadas envers la clamada publica.

Appartegnentas ed appartegnents da l'armada, dals quals il servetsch d'instrucziun da las furmaziuns figurescha sin la clamada publica survegnan 20 emnas avant il cumenzament dal servetsch in'annunzia da servetsch.

Ademplir servetschs d'instrucziun (art. 58 OOSM)

1. Ils servetschs d'instrucziun ston vegnir ademplids cumplainamain per la durada ch'è inditgada sin la tavla militara da clamada.

2. Ils servetschs d'instrucziun pon vegnir prestads excepziunalmain en parts, sch'igl è avant maun in basegn da servetsch u sche l'interess privat ubain l'interess da la patruna u dal patron predominescha l'interess public. Il Cdo Instr decida davart las dumondas.

3. Per appartegnentas ed appartegnents da l'armada che han tar la relaschada dal servetsch d'instrucziun da basa prestà almain 80 pertschient da la durada cumplina e vegnan qualificgads almain sco suffizients en la qualificaziun approvada, vala il servetsch d'instrucziun da basa sco adempli.

Cumpensaziun da servetschs d'instrucziun betg ademplids (art. 46 – 48/58/93 OOSM)

Appartegnentas ed appartegnents da l'armada che n'han betg ademplì il servetsch d'instrucziun da basa, vegnan clamads en servetsch il proxim termin pussaivel per la durada restanta.

Sche persunas ch'èn obligadas da far servetsch militar n'han betg ademplì lur servetschs d'instrucziun perquai ch'i mancan dis imputabels u perquai ch'ellas han suspendì il servetsch, ston ellas repeter ils servetschs d'instrucziun en lur durada totala resp. fin che l'entira obligaziun da far servetsch è ademplida. Per la prestaziun da curs da repetiziun supplementars po la u il AdA inoltrar ina dumonda al Cdo Instr, Pers A. L'obligaziun da prestar il servetsch d'instrucziun è reglà en ils artitgels 46 – 48 da l'OOSM.

Dumonda da suspensiun (art. 90 - 91 OOSM)

Appartegnentas ed appartegnents da l'armada ch'èn previs per ina nova funcziun resp. per in grad superiur dastgan vegnir clamads – avant ch'els han terminà lur servetschs d'instrucziun da basa – a servetschs d'instrucziun da las furmaziuns mo cun lur consentiment, nun ch'igl existia in basegn urgent da l'armada.

Entrar en servetsch il di avant (art. 50 OOSM)

Las personas obligadas da far servetsch militar che na vegnan betg a temp cun ils meds da transport publics, pervia ch'ellas abitan lunsch davent, dastgan entrar en servetsch il di avant. En quest cas duain ellas infurmar correspondentamain lur cumandant ad ura. Il cumandant emetta a tals AdA in nov cumond da marschar e regla l'alloschi sco er l'alimentaziun al lieu d'entrada en servetsch.

Curs da preparaziun dal cader (art. 59 e 60 OOSM)

Per preparar servetschs d'instrucziun pon vegnir manads tras curs da preparaziun dal cader. Per regla duran els:

- a. per appartegentas ed appartegnents da la schuldada en in curs da repetiziun: maximalmain set dis;
- b. per appartegentas ed appartegnents da la schuldada en auters servetschs d'instrucziun: maximalmain set dis supplementars per:
 - lavurs en il curs da preparaziun dal cader;
 - preparaziun administrativa e logistica;
 - lavurs da relaschada.
- c. per sutuffiziers, sutuffiziers superiors ed uffiziers maximalmain 10 dis supplementars per:
 - rapports en il rom da la preparaziun;
 - exploraziun;
 - preparaziun administrativa e logistica;
 - lavurs da relaschada.

Malsogna ed accidents (art. 84 LPM, p. 36/40 regl 51.002 brevier)

Persunas malsaunas resp. blessadas ch'èn transportablas han d'entrar en servetsch ed han da s'annunziar tar la visita d'entrada sanitaria. Persunas malsaunas resp. blessadas betg transportablas han da trametter en ina cuverta serrada a lur cumandant il pli tard sin il di d'entrada il cudeschet da servetsch sco er in attestat da la media u dal medi che conferma expressivamain l'inabilitad da viagiar. Ellas pon er annunziar electronicamain (fax u e-mail) la spediziun.

Suspensiun dal servetsch (art. 90 – 94 ed agiunta 6 OOSM, p. 76/77/78 regl 51.002.01 brevier, WDVS dal SdA e dal S Cdo Instr)

Dumondas per suspender il servetsch militar ston vegnir inoltradas da las personas obligadas da far servetsch militar il pli tard 14 emnas avant ch'il servetsch cumenza en scrit u en furma electronica a l'autoridad da militar dal chantun da domicil. Dumondas per suspender il servetsch militar che na vegnan betg inoltradas entaifer quest termin, pon vegnir approvadas da l'autoridad correspondentia mo sch'in motiv urgent e betg planisabel è avant maun.

Las dumondas ston vegnir inoltradas cun:

- a. la sutscriziun dal requirent;
- b. ina motivaziun ed ils documents da cumprova correspondents; e
- c. la perioda da temp ch'il requirent po far servetsch.

Las dumondas da suspender il servetsch militar pon er vegnir inoltradas electronicamain sco document da PDF en l'agiunta d'in e-mail ubain sco e-mail. En general sto vegnir fatg diever dal formular uffizial (DVS-Formular): www.armee.ch/info - Dienstleistende - Dienstverschiebung - Downloads/Formulare.

Sch'ina dumonda per suspender il servetsch militar vegn inoltrada sco e-mail, sto quel cuntegnair almain ils suandants puncts:

- a. persunalias da la/dal AdA:
 1. numer d'assicuranza AVS,
 2. grad, funcziun ed incorporaziun,
 3. num, prenum ed adressa,
 4. numer da telefon ed adressa dad e-mail;
- b. indicaziuns davart il servetsch che duai vegnir suspendì, inclusiv las datas dal servetsch militar;
- c. motivaziun da la dumonda da suspender il servetsch militar;
- d. documents da cumprova, sin ils quals la petenta u il petent sa basa: en il format PDF.

Uffiziers a partir dal grad da chapitani (incl. uffiziers subalterns che han ina funcziun da chapitani u sutuffiziers pli auts ch'èn incorporads en stabs) inoltreschan lur dumonda sin via da servetsch al Cdo Instr, Persunal da l'armada (Pers A).

Post d'infurmaziun

Ils numers da telefon da posts da servetsch militars, l'adressa militara cumpletta sco er il lieu ed il numer da telefon da las furmaziuns pon vegnir dumandads dal biro Svizra, 031 381 25 25. Ulteriusas infurmaziuns che concernan l'adempliment da l'obligaziun da far servetsch militar chattais Vus en l'internet sin www.armee.ch/info .